

Johane 3:16 Shi ku tikya Urezha ma taa suna ldivu nanyina, ka dzisa Mwanake yii ma taa pakwa yeekye, a tikya ta panga iyani yii mati tishira mo kukeka ka fweeldira, paa ta a mwene wuparo wuu wu ha mana.

3:17 Shi ku tikya Urezha muqhu ku ka tuma Mwanake moni ldivu ku yambaaza ldivu, paa ku tikya ldivu ldi yakwa shake.

3:18 “Yi mati tishira mo kuke ka yambaazwa; yuu ha tjire ku tishira ma yambaazwa ndji namushi, ka muqu ku tishira moni ldina ldi Mwana Urezha yii ma ta pakwa yeeke.

3:19 Indjambaazo yini, ati ldiye ldi ta ya moni ldivu, paa awato wa siine karema ku kita ldiye, shi ku tikya zisuu zawo zari zibi.

3:20 Shi ku tikya uwumwe ni uwumwe yii mati rasi wubi mati  
tjuma ldiye, mo qhwaati a ku ya ku ldiye, ta thema zisuu zake  
zi horominwa.

3:21 Yi mati rasi zantjamu mati ya moni ldiye, ati zisuu zake  
zi tjhaturwa, indzi za rasiywa mo ku Urezha.”

Johane 5:19 Popaa Giso ka wa zoromuna atikyaa: “Intjamu,  
nda ti ni teya, Umwanazara ka rasi yeeke, tana she shi a mati  
mwana She mati shi rasi; shi ku tikya izuto ze zi a mati rasi,  
Umwanazara indjiye undji ku zi rasi akyo.

5:20 Shi ku tikya Tate u siine Umwanazara, paa ta undji ku mo  
raqe koozo ze zi amati rasi, paa kuti a mu raqe zisuu ze zi kuru  
ku zinii, ati ni radzuwu.

5:21 Shi ku tikya nga hoshi Tate a mati tambusa wafu, ka ti wa  
yumusa, inkha ku sire akyo, Umwanazara indjiye undji ku  
yumusa wa wa mati suna ku yumusa.

5:22 Tate ka yambaaza umutu uwumwe, paa indjamburo kooyo a  
yi paa Umwanazara

5:23 Ati koowo wa susa Umwanazara nga hoshi wati susa Tate.

Yuu hara ti susa Umwanazara muqhwaati a ku susa Tate yii

mata ka mu tuma.

5:24 Intjamu, intjamu nda ti ni teya, yii mati yivwa ldiyi

ldanga, paa ta mati tishira yii mata ka ndi tuma, una ni wuparo

wuu wu ha mana, paata muqhu ku ndjena mati mwana tjaambo,

ma dzu moni rufu, ma kitiri moni wuparo.

5:25 Intjamu, intjamu, nda ti ni teya, rusuku rwa ya, indji

namushi rwa ya, ro ri wafu itje wa yivwe Munu Urezha sharo,

paa wuu wati yivwa itje wa pare.

5:26 Shi ku tikya nga hoshi Tate ana ni wuparo mo kuke yeeke,

mata pa Umwanazana indjiye akyo, ati a ye ni wuparo mo kuke

yeeke.

5:27 A mupa ixhumu yeyi ku rasi indjimbaazo, shi kuti

Umwanzara.

5:28 Kani ka radzuuwaama tjoo, shi ku tikya rusuku rwa ya,

rori koowo wa wa moni zinzimba itje wa yivwe ldiyi ldake

shaldo.

5:29 Paa itje wadzwe, wuu wata rasi wuqa wadzwe wa

tambushire wuparo; paa ta wuu wata ragqo wubi wadzwe

watambushire tjambo. Wayindisi wa Giso

5:30 “Ka ndi pomu ku rasi itjimwe meeke; ndati yambaaza nga

hoshi Urezha a mati ndiira, paa indjaambaazo anga inqa,

shikati ka ndi pomu ku rasi shi kusuna kwanga, tana shi ku

suna kwa yii mata ka ndi tuma.



Johane 6:35 Giso ka wa teya a tikyaa: “Ndjime shinkhwane shi wuparo; yii mati ya kume, ka moni itji a burwa ku indjara, indji yii mati tishira mo kume, itje muqhu ku fwa ldinata nangweza.

6:36 Nda ni teya a tikyaa, nata ndi mwana, panga ku kukyo kani pomo ku tishira.

6:37 Koowo wa wu Tate ama ti mpa kuti waye mo kume; paa yii mati ya mo kume, itje ndi muqhu ku mo rakhiama kwiindje iyemwa.

6:38 Shikati ndata suka ku lduuru, ndi muqhu kuya ku ku rasi ku suna kwanga, tana ku suna kwa yii mata ntuma.

6:39 Ku suna kwa yii mata ka ntuma, ku kuti, kooko mo mwaa  
mata ka ndi *pa ka ndi* ka rakhiywaama ku itjimwe, tana kuti ndi  
shi tambusa moni ldiwa lida kamana

6:40 Shikati ku suna kwa Tate monii, ati uwumwe ni uwumwe  
yii mati mwana Urezha, amu tishiri, a mwene wuparo wuu  
wusha mana, paa itje ndi mo tambusa moni ldiwa lida  
kamana.”



Johane 10:11 “Memu moldaazi yuu shishanga, moldaazi yuu shishanga indji ku yishira magu wuparo wakye.

10:12 Yii mata zuura shaldo i hari moldaazi, ywa magu i hari ingakye, a kati mwana umpuru mati ya, indji ku ldesha magu, ka tiya, umpuru ka wa pata, ka wa rapaara.

10:13 Indji ku yopa shi ku tikya modzuurwa ngatjo, paa ta muqhu itjimwe ni magu.

10:14 Memu moldaazi yuu shishanga, paa ta nga ari inganga ndi waa yizire, indjingo ngaa nganga a ndi yizire.

10:15 Nga hoshi indji Tate a ndjizire, indjime ndi yizire Tate: paa indi ku yishira magu wuparo wanga.

10:16 Ta ndi na ni magu marwezi, nga a hari ingu rwaanda rani; indji ngo ndi na ni ku a ldeta, paa kuti a yivwe ldiyi ldanga, paa ta kuti a rasi magu nga wu rwaanda ru chiki.

10:17 Intjamu Tate a ndi siine, shi ku tikya indji ku yika wuparo wanga, ati itje ndi wu pate nangweza.

10:18 Kuqhu yii ma ti wu ndjisiza, paa nda ti wu ldi yishira ngatjo. Ndi na ixhumu iku wu yika, ta nangweza ndi na ixhumu ye yi ku wu pata. Shinxe tjini nda shi tjindjiri mo ku Tate.

Johane 11:1 Kwa rana umutu yii mati mashira, mari e Lasaro  
ywa Bethania, muzi awa nqwaa Maria indji Maretha mokorakye!

11:2 Maria yopaa ndjiye yii mata ranca Shikati amazi, ka mu  
raqe zikondo shi zinshwishi zakye. MugqenwaakeLasaro ndji  
yi mari ku mashira.

11:3 Kukyanii wamugqenwaakewa ta tuma ku kukenga wa  
tikyaa: “Shikati, momwe, yu usiine mati mashira.”

11:4 Ati Giso a ku yivwa, ka hwete ka tikyaa: “Womashira  
woo iqhwaa ngu rifu, ungu intjeeniso yu Urezha ati Muna  
Urezha a tjeeniswa shawo.

11:5 Giso marasiine Maretha, mozatakeindji Lasaro.

11:6 Kukyani ati aku yivwa ati kya mati mashira, ka kyoo ka ya  
kara shara mayiwa a yiri ko ku a ma rana.

11:7 Ku ldiqo lida po ka teya wayayaatwi wa keka tikyaa:

“Thende nangweza ko Judea.”

11:17 Kukyani ati Giso a ku ya, ka shangana taa yisa mayiwa  
ngaa nee moni inzimba.

11:18 Kukyani Bethania yari shifupi ni Jerusalema,

11:19 wajuda waa wendji wa taaya ku ku wapata ni maandja,  
mo ku Maretha indji Maria ko ku wa totuza sha mogqenuawo.

11:20 Popaa Maretha ati a ku yivwa shi Giso a mati ya, e ka  
tjingaaza; paa Maria ka kara usise moni indjuwo.

11:21 Maretha ka teya Giso ka tikyaa: :Shikati, panga pani pu  
ma rana, mugqenwaanga tjuwa muqhu ku fwa.

11:22 Indji kukyani ndi yizire atikya ta panga shikya she shi  
mati romba Urezha, Urezha kuti a ku petjo.”

11:23 Giso ka mu eya ka tikyaa, “Mugqenwaaywe kuti a  
tambukye.”

11:24 Maretha ka mu teya ka tikyaa: ‘Ndi yizire shi itje a  
tambukepapu ku tambhuka moni ldiwa lida kamana.”

11:25 Giso ka mu teya ka tikyaa: “Memu ku tambuka indji  
wuparo, yii mati tishira mo ku me, panga ndji mafu, panga ku  
kukyo kuti a pare:

11:26 Ta panga iyani yii ma ti para, taa ku tishira mo kume,  
itje muqhu ku fwa iyemwa. A nganii mati a tishira?”

11:27 Ka mu teya ka tikyaa: “Ein, shikati, nda tishiri shuuri u  
Kirisiti, Munu Urezha, ta ndjiye yii mati ya mo ku ldivu.”

Johane 14:1 Keemeyo enu ka yi ka zukaashika, ni tishire mo  
ku Urezha, ni tishire indji mo kume.

14:2 Moni indjuwo ye ya Tate, muna masuso nga mendji; panga  
kwari ku qhwaakyo, tjiwa nda ta ni ziira, shi ku tikya nda  
teenda ku ku ni raxauxauma masuso.

14:3 Paa ka nda teenda ku ku ni raxauxauma masuso, itje ndi ye  
nangweza, paa itje ndi ni ldiyisiza, ati kya ko ku ndi na  
indjinwe ni sikame ko.

14:4 Ko ku nda teenda ni yizire ndjira ya ko.”

14:5 Thomase ka mu teya ka tikyaa: “Shikati, ka ti yizire ko  
ku ma teenda; ikyare ti na ku yiwa indjira.”

14:6 Giso ka mu teya ka tikyaa. “Memu indjira, indji intjamu,

indji wuparo, ka kuya uwumwe ko ku Tate tana shame.



Johane 15:1 “Ndjime mofini wu intjamu, Tate ndji Muxauxauti infuwa.

15:2 Ingamu iyimwe ni yimwe ye ya mo kume, yii yi ha pata, indi ku yi kusa; paa indcamu iyimwe ni yimwe yii yi pata, indi ku yi qasa, ati yi pate nanyina.

15:3 Yenwe ni shiri waqa indji akyani, shiinkha ye yi ldiyi lde ldi nda ta hweta nanwe.

15:4 Ni sikame mo kume, indjime mo kunwe. Nga hoshi ingcamu yi ha moni ku pata yweekye, andji yi hara kara moni mofini, inkha ku sire indjinwe, ani ni hara sise mo kume.

15:5 “Ndjime mofini, yenwe ni zingcamu, yuu sise mo kume,  
indjime mo kukye, indjiye yii ma ti pata nnyina, shi ku tikya  
kwindje ldanga kani pomu ku rasi itjimwe.

15:6 Umuto andju hara sise name, undju ku akhianunwa ko ku  
kwindje ati ingcamu, paa ta ngayi kukutiri, awato wa zi  
yurumikye, wa zi rankhiamina moni mundiro, paa ta nga zi  
lduwa ku mundiro.

15:7 Ani na ti sikama mo kume, indji mayi anga a ku sikama  
mo kumwe, ni rombe she shi na ti suna, paa kuti ni shi  
rasiaminwa.

15:8 Tate ma ti ndjeeniswa kuikyo, ku kuti, ani na ti pata  
nanyina, akyo kuti ni rasi wayayaatwi wa nga.